

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

**Siunnersuut uunga: Isiginnaartitsisarfeqarneq pillugu Inatsisartut inatsisaata
allannangortinnera pillugu Inatsisartut inatsisaat nr. xx, xx. xxx 2019-imeersoq
Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq**

Pillugu

ISUMALIUTISSIISUTAA

Siunnersuutip aappasaanneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq suliaqarnermi kingullermi makkuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Mimi Karlsen, Inuit Ataqatigiit, siulittaasup tullia
Inatsisartunut ilaasortaq Aqqaluk Heilmann (sinniisoq), Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Sofia Geisler, Inuit Ataqatigiit

UKA2019-imi ulloq 25. marts siunnersuutip siullermeerlugu oqallisigineqarnerata kingorna siunnersuut ataatsimiititaliamit misissorneqarpoq.

1. Siunnersuutip imarisaa siunertaalu

Nunatta Isiginnaartitsisarfiaa siulersuisua aqutsinermik ilisimasaqartumik toqqaasoqartarnissaata qulakkeerneqarnissaanik kissaateqarnera akuersaarlugu matumuuna Naalakkersuisut inatsisissatut siunnersuusiorput. Tamatuma saniatigut Naalakkersuisut siunnersuutigaat (kalaallit isiginnaagassiertartut peqatigiiffiata) KAISKA-patorunnaarneratigut tamatumalu saniatigut SILA pilersinneqarneratigut (maannakkut kalaallit isiginnaagassiertartut peqatigiiffiat) KANUKOKA-ltu atorunnaarnerat aallaavigalugu inatsit nutarterneqassasoq. Isiginnaagassiertartut peqatigiiffiata siulersuisua inatsisip § 1-ia tunngavigalugu peqatigiiffinni ataavartumik allannguisarsinnaanerat tamatumunnga ilanngullugu siunnersuutigineqarpoq. Naggasiullugu Nunatta isiginnaartitsisarfiani assigisaannilu atorfinitssisarnerit pillugit tunngaviusumik isumaqatigiissusiornissamut piginnaatitsisoqarpoq.

2. Tusarniaanermi akissutit

Tusarniaanermi akissutit inatsisisstatut siunnersummut ilanngunneqarput, tamannalu inatsisartut siulersuisusa ilusilersuinissamut piumasaqaataannut naapertuuppoq. Tusarniaaffigineqartut tusarniaanermullu piffissaritinneqartoq siunnersummut oqaaseqaatini immikkoortoq 8-mi takuneqarsinnaapput. Naalakkersuisut tusarniaanermut akissutinut piumassuseqarlutik naaperiaasimanerat ataatsimiititaliamit pitsaasutut isigineqarpoq, taamaalillutilu soqutigisaqartut oqaaseqaatitut nassiussimasaat tunngavigalugit inatsisisstatut siunnersuut aaqqissuussimallugu.

3. Inatsisisstatut siunnersuutip nassuiarneqarnera

Ulloq 21. marts 2019 inatsisisstatut siunnersuut pillugu ataatsimiititaliaq nassuaaffigineqarpoq. Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq ataatsimiinnermi peqataavoq.

4. Ataatsimiititaliap siunnersummik suliaqarnera

Inatsisip atuuttup naleqqussarneqarnissaanik pisariaqartitsinerup siunnersuut manna kingunerigaa ataatsimiititaliamit paasisimaneqarpoq – pisariaqartitsineq Nunatta Isiginnaartitsisarfianit namminermit oqaatigineqarpoq. Kalaallit isiginnaartitsisartut kattuiffiat inatsisip §4, imm. 2 tunngavigalugu atorunnaarsimasoq ataatsimiititaliamit maluginiarneqarpoq, tassami kattuffik taanna siunnersuutip nalinginnaasumik oqaaseqaataani allassimasutut atorunnaarsimammatt.

Siunnersuutip § 1, nr. 3-ani makku takuneqarsinnaapput:

3. § 4-mi imm. 4-p kingorna immikkoortut nutaatut ilanngunneqassapput:

” Imm. 5. Kattuffit imm. 2, nr. 1, 3 aamma 4-mi eqqaaneqartut arlaat taaguumminik allannguissagaluarpat inassuteqarneq taassumannga isumagineqassaaq.

Imm. 6. Kattuffit imm. 2, nr. 1, 3 aamma 4-mi eqqaaneqartut atorunnaarsinneqassagaluarpata Naalakkersuisut ilaasortamik toqqaassapput kattuffiup atorunnaarsinneqartup suliassaqarfingisimasaanik ilisimannittumik.”

Inatsisip § 4, imm. 2-a tunngavigalugu peqatigiiffiup innersuussisinnaasup atorunnaarsinnejnarera kingunerisaanik peqatigiiffimmik nutaamik pilersitsisoqassappat, inatsisisstatut siunnersuut akuerineqareeraluarpalluunniit pisariaqarsinnaavoq suli inatsimmik allanngortitsinissaq. Peqatigiiffik innersuussisinnaasoq taaguutiminik allannguisimappat aalajangersagaq qulaani pineqartoq atutissaaq.

Nunatta Isiginnaartitsisarfiata Naalakkersuisullu atorfinititsisarneq pillugu tunngaviusumik isumaqtigiissutaat Nunatta Isiginnaartitsisarfiata malissagaa siunnersuutikkut peqqussutigineqarpoq. Aaqqiineq tamanna nalinginnaasumik oqaaseqaatini tunngavilersuutit uku malillugit qinerneqarsimavoq:

“Nunatta Isiginnaartitsisarfiani sulisut ilarpassui isumaqtigiissutinut ilaanningerat, atorfinnullu taamaattunut isumaqtigiissusiortoqarsimannginna tamatumunnga tunngavilersuutaapput. Aamma pilersaarutinut atorfinititsisoqartarnera atorneqangaatsiarpoq, atorfiillu taakku Namminersorlutik Oqartussani atorfinnut allanut assersuukkuminaassinnaallutik”

(Ataatsimiititaliap erseqqissaanera)

Nunatta Isiginnaartitsisarfiani atorfinititsisarnernut ersarinnerusumik isumaqtigiissusiorsinnaaneranik aalajangersaasoqarnera ataatsimiititaliamit pitsasutut isagineqarpoq – tamanna suliffeqarfimmuit tunngatillugu, kisiannili aamma sulisut illorsorneqarsinnaanerannut tunngatillugu. Qulaani issuaanermi naatsorsuutigineqarpoq, Nunatta Isiginnaartitsisarfiani sulisut ikinnerusut isumaqtigiissutit tunngavigalugit suliffeqartut. Sulisunut isumaqtigiissutinik atuisinnaanermut tunngavissaqartumik tunngaviusumik isumaqtigiissut atuutissanngitsoq taamaalillugu ataatsimiititaliamit naatsorsuutigineqarpoq. Atorsinnaasumik isumaqtigiissuteqartillugu, Nunatta Isiginnaartitsisarfiani sulisunik atorfinititsinermi tunngaviusumik isumaqtigiissummit taakku sallitinneqartarnissaat taamaalilluni tunngaviusumik isumaqtigiissummi innersuunneqarsinnaavoq. Taakku atuutissanngikkaluarpata, tunngaviusumik isumaqtigiissummi nalinginnaasumik aalajangersakkat atuutiinnartussaapput. Nunatta Isiginnaartitsisarfianit imaluunniit Naalakkersuisunit tamatuma kissaatigineqannginna naatsorsuutigineqarsinnaavoq. Taamatut oqaasertaliinermut Naalakkersuisut isumaqataanngippata siunnersuutip aappassaaneerneqarneranut atatillugu tamanna Naalakkersuisut ilisimatitsissutigissagaat tunngavilersorlugulu ataatsimiititaliamit qinnutigineqassaaq.

Allatigut oqaaseqaateqarnissamut ataatsimiititaliaq tunngavissaqanngilaq.

5. Siunnersuutip aningaasatigut kingunerisassai

Siunnersuutip aningaasatigut kingunerisassai nalinginnaasumik oqaaseqaatinut ilanngunneqarsimapput. Taamaasillugu takuneqarsinnaavoq siunnersuut aningaasatigut kinguneqartinneqassanngitsoq. Tamanna allatut oqaaseqarfiginagu ataatsimiititaliamit tusaatissatut tiguneqarpoq.

6. Ataatsimiititaliap inassuteqaataa

Ataatsimiititaliap **isumaqtigiittup** siunnersuutip **akuersissutigineqarnissaa** inassutigaa.


Taamatut oqaaseqarluni isumaliutissiisummilu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

For: 

Doris J. Jensen
Siulittaasoq



Mimi Karlsen
Siulittaasup tullia



Nivi Olsen


Aqqaluk Heilmann



Sofia Geisler